

子曰、學而時習之、不亦說乎。有朋自遠方來、不亦樂乎。人不知而不慍、不亦君子乎。

子曰、巧言令色、鮮矣仁。

子曰、吾十有五而志于學。三十而立。四十而不惑。五十而知天命。六十而耳順。七十而從心所欲、不踰矩。

子曰、溫故而知新、可以為師矣。

子曰、學而不思則罔。思而不學則殆。

子曰、德不孤、必有隣。

子曰、後生可畏。焉知來者之不如今也。四十·五十而無聞焉、斯亦不足畏也已。

子曰、君子和而不同。小人同而不和。

子曰、人無遠慮、必有近憂。

子貢問曰、有一言而可以終身行之者乎。子曰、其恕乎。己所不欲、勿施於人。

子曰、過而不改、是謂過矣。